

մայր եկեղեցին, որ հրապարակին միւս ծայրն  
եղած է, ընդդէմ Ս. Նիկողայ եկեղեցւոյն: Թրքած  
տիրապետութեան միջոց քանդուած են Ս. Աւետ-  
ման և Ս. Նիկողայոս եկեղեցեաց դռներն, և  
պատուհաններն նիւթ կրակի եղած: Այժմեան  
Աստուածամօր Վերափոխման եկեղեցին՝ ոչ Սի-  
նանին շինածն է և ոչ Հրիհորի և ոչ Միխնայի  
հրաշափառ և պայծառ զարդարածը, այլ ինչպէս  
կը վկայէ հին ճաշոցին նոր յիշատակարանը, ԺԸ  
դարու վերջին կիսուն մէջ շինուած է, հանդերձ  
իւր լայնանիստ զանգակատամբ: Մեծամեծ հըր-  
դեհներ և թշնամեաց յարձակմունքներ՝ այնպիսի  
զօրաւոր դաս եղած են կամենիցի հայկազանց՝ որ  
ստիպուած են ներկայ քարակարկառ շէնքը շինել  
որ կարենայ դիմանալ հրդեհի դէմ, և թշնամեաց  
յարձակմանց: Զի ինչպէս ճակատը՝ նոյն իսկ ամ-  
բողջ շէնքն ամբարտակ մի է սրբատաշ քարերով  
շինած և կրով մածուցած: Քարէ սանդուխներով  
վեր կ'ելնըցուի, սիւնազարդ ճակատը, ուստի կը  
մտնայ եկողն ընկարձակ գաւթի մէջ որ սրահի  
ձևով զեկեղեցին երեք կողմանէ կը պատէ: Եթէ  
չէնքս աւելի հին լինէր, կարելի էր ենթադրել որ  
այդ սրահը իրրև մատաղատուն շինուած լինի: Ըստ  
բերանացի վկայութեան Ռոլլէ հնախօսին այդ ըն-  
դարձակ սրահը՝ հեռաւոր տեղերէ եկող ուխտա-  
ւորաց ապաստանարան շինուած է, ընդդէմ արևու  
և անձրևի. վասն զի ընդ համօրէն Լեհաստան  
հոչակեալ են հրաշք Աստուածամօրս Հայոց՝ որ  
կը պաշտի այս սուրբ Տաճարիս մէջ. այն պատճա-  
ռաւ ոչ միայն հարուստ ունեւորներ ուխտագիր կը  
լինին առ Տիրամայրս, այլ և չքաւորներ ևս, որք  
հեռաւոր տեղերէ կու գան, որոց ծածք հարկաւոր է: